

東

華

錄

東華錄

順治三

臣王先謙敬編

臣周澗蕃恭校

秋七月丙戌朔兵部右侍郎金之俊啟言凡土寇率眾歸順者應赦罪勿論縛渠來獻者應分別敘功就撫之眾州縣官編置牌甲令安故業無恒產者設法安插請頒諭各鎮道府以便遵行攝政睿親王諭土寇本皆吾民渠魁能率眾來歸自當赦罪同黨能縛獻賊首自當論功其就撫之民必馬匹兵器盡數交官方見真心就撫牛驢乃農事必需毋得括取滋擾作速行文各道府轉行所屬將地方有無土寇會否歸降據實詳報卽以此定各官之殿最如有玩寇殃民或貪功生事者必治罪不宥○丁亥禮部啟言定鼎燕京應頒寶祿據欽天監咨稱新法推註已成請易新名伏候

欽定以便頒行攝政睿親王諭治麻明時帝王首重今用新法正
麻以敬迓天休誠爲大典宜名時憲麻用稱朝廷憲天乂民至意
自明熹順治二年爲始卽用新麻頒行天下監局各官仍公同證
訂新法註麻作速繕寫裝潢呈覽○戊子令平定山東固山額眞
覺羅巴哈納石廷柱等移師會固山額眞葉臣軍定山西○己丑
禮部議覆順天督學御史曹溶條議考拔貢生應聽學臣於所至
之地便宜考試至褒揚節孝原屬舊制自逆寇荼毒京師誓節死
難之臣所在多有宜聽學臣詳訪啟聞卹其子孫旌其門閭以勵
風節攝政睿親王從之○壬辰以吳華昌爲右僉都御史總督宣
大山西等處兼管巡撫由吏部員外郎遷以侍郎劉餘祐金之俊保舉故
也○以方大猷爲右僉都御史巡撫山東由招撫山東監軍副使遷○癸巳

上以遷都燕京遣官祭告 上帝 太廟 福陵○甲午祭告

大行皇帝○修政厯法湯若望啟言臣製就渾天星球一座地平日晷窺遠鏡各一具並輿地屏圖恭進王覽再照臣所修西洋新法已蒙欽定爲時憲寶厯所有應用諸厯從此永依新法推算其頒行民厯式樣俟完日進呈攝政睿親王諭所進測天儀器准留覽應用諸厯一依新法推算其頒行式樣作速催竣進呈○天津總督駱養性啟請豁免明季加派錢糧止徵正額並火耗攝政睿親王報曰官吏犯賊審實論斬前諭甚明所啟錢糧徵納每兩火耗三分正是貪婪積弊何云舊例況正賦尙宜酌蠲額外豈容多取著嚴行禁革如違禁加耗卽以犯賊論○乙未宣府巡撫李鑑啟薦故明宣大總督江禹緒令吏部行取來京錄用○以黨崇雅爲戶部侍郎故明戶部侍郎○錦衣衛官舍李諫善啟進自置莊田攝政睿親王諭故明動戚贍田己業俱准照舊乃朝廷特恩不許官吏

侵漁土豪占種各動衛官舍亦須加意仰體毋得滋事擾民○丙申吏部侍郎沈惟炳啟請徵聘遺賢以收人望攝政睿親王從之○丁酉朝鮮賀定燕京貢方物○索倫部章京敖爾拖木爾等來貢○招撫山東河南侍郎王鰲永啟薦山東故明大學士謝陞等四十餘人事下吏部又啟報濟南東昌青州臨清等州郡以次撫定並齎送故明德王朱由槩降表又密報聞南中已擁立福王改元宏光以史可法爲內閣封總兵劉澤清劉良佐黃得功高傑等分據各鎮江北之地彼所必爭請亟補鎮臣移駐曹單控扼淮徐下所司確議○己亥兵部右侍郎金之俊啟薦故明薊遼總督丁魁楚陝西總督丁啟睿陝西巡撫練國事副都御史房可壯吏部員外郎左懋泰河東守道郝炯等攝政睿親王令衛送來京錄用○戶部給事中郝傑條陳四事一勸農桑以植根本一撫逃亡以

實戶口一禁耗贖以除苛政一嚴奢侈以正風俗攝政睿親王以其言有裨新政令該部院卽飭行○山東巡按朱朗鑠啟言中外臣工皆以衣冠禮樂覃敷文教頃聞東省新補監司三人俱關東舊臣若不加冠服以臨民恐人心驚駭誤以文德興教之官疑爲統兵征伐之將乞諭三臣各製本品紗帽圓領臨民理事攝政睿親王諭目下急勦逆賊兵務方殷衣冠禮樂未遑制定近簡用各官姑依明式速製本品冠服以便蒞事其尋常出入仍遵國家舊制○庚子大同總兵官姜瓖因王諭切責內不自安至是具啟引罪求罷攝政睿親王諭令洗心易慮管總兵官事如故儻仍前不悛越分干預國有定法毋自取戾○設故明長陵以下十四陵司香內使各四人○辛丑上以中原平定免盛京滿洲漢人額輸糧草布疋○壬寅攝政睿親王諭官吏軍民人等曰嘗聞德惟善

政政在養民養民之道必省刑罰薄稅歛然後風俗醇而民生遂自明季禍亂以來刁風日競閭閻細故輕瀆聽聞以赴訴爲等閒以誣告爲常事設機構訟敗俗傷財心竊痛之自今以往嘉興維新凡五月初二日昧爽以前不拘在京在外事無大小已發覺未發覺已結正未結正悉行宥免如違諭興訟者卽以所告之罪罪之官司受聽者併治以後鬪毆婚田細事止就道府州縣官聽斷歸結重大事情方赴撫按告理在京仍投通狀聽通政司查實轉送刑部問擬其五城御史有例應受理送問者照舊送問非係機密重情不許入京赴訴儻奸棍訟師沿襲惡俗陷害良民定加等反坐以挽澆風至於前朝弊政厲民最甚者莫如加派遼餉以致民窮盜起而復加勦餉再爲各邊抽練而復加練餉惟此三餉數倍正供苦累小民剔脂刮髓遠者二十餘年近者十餘年天下嗷

嗷朝不及夕更有召買糧料名爲當官平市實則計畝加徵初議准作正糧旣而不與銷算有時米價騰貴每石四五兩不等部議止給五分之一高下予奪惟賄是憑而交納衙門又有奸人包攬猾胥抑勒明是三餉之外重增一倍催科巧取殃民尤爲批政茲哀爾百姓困窮夙害未除痼瘼切體儆天之靈爲爾下民請命自順治元年爲始凡正額之外一切加派如遘餉勦餉練餉及召買米石盡行蠲免各該撫按卽行所屬各道府州縣軍衛衙門大張榜示曉諭通知如有官吏朦朧混徵暗派者察實糾參必殺無赦儻縱容不舉卽與同坐各巡按御史作速叱馭登途親自問民疾苦凡境內貪官污吏加耗受賂等事朝聞夕奏毋得少稽若從前委派刑官查盤委府州縣訪惡純是科索紙贖搜取贓罰名爲除害實屬害民今一切嚴行禁絕州縣倉庫錢糧許道府時時親

嚴衙蠹豪惡止許於告發時從重治罪總不容假公濟私朘民肥
 己有負朝廷惠養元元至意○諭諸王及官民人等曰凡我黎民
 無論新舊同屬朝廷赤子近聞有將歸順人民給與滿字背帖徑
 充役使或給發贄本令其貿易同於家人或擅發告示占據市行
 與民爭利虧損國稅亂政壞法莫此爲甚除已往姑不追究外自
 今傳諭以後宜亟改正若仍怙勢不悛定置重典決不輕宥其新
 附軍民力能自贍者宜各安本業不許投充勢要甘爲奴僕如有
 奸棍土豪自知積惡畏懼有司因而委曲鑽營結交權貴希圖掩
 飾前非仍欲肆志害民者定行加等重治如果鰥寡孤獨無計自
 存許親赴順天府呈告轉咨戶部啟聞○平定山東固山額真覺
 羅巴哈納石廷柱言前遣人招故明總督李化熙已約期來見尙
 有王副將趙旂鼓懼罪不降攝政睿親王令兵部移咨招化熙並

王副將趙旂鼓降○癸卯左庶子李若琳啟薦故明詞臣陳具慶
韓四維林增志高爾儼張懸錫成克鞏等攝政睿親王令衛送來
京錄用○太監吳添壽等請照舊例遣內員徵收涿州寶坻縣皇
莊錢糧攝政睿親王諭差官必致擾民著歸併有司另項起解○
順天督學御史曹溶條陳三事一開支庫餉請仍明制在京者戶
部支給在外者州縣官支給一賑助貧生兵燹之後士有菜色請
廣新恩給以錢粟一優卹死節寇亂時臨難殞身者順天一學不
下百人請沛浩蕩之恩用勵風化下所司亟議行○甲辰以楊方
興爲兵部右侍郎兼右僉都御史總督河道由內秘書院學士遷馬國柱爲
右副都御史巡撫山西由左僉都御史遷陳錦爲右僉都御史巡撫登萊
由內院副理事官遷○吏部左侍郎沈惟炳啟薦故明尙書張忻等三十餘
人令詳註履歷以聞已奉諭起用者仍行文催取○遣官往房山

訪金朝陵寢仍繪圖進覽○招撫山東河南侍郎王鰲永啟報撫
定青州郡縣並齋故明衡王降書以聞又請蠲免山東錢糧如河
北例從之○修政厯法湯若望啟言敬授民時全以節氣交營與
太陽出入晝夜時刻爲重若節氣之時日不真則太陽出入晝夜
刻分俱謬矣厯稽大統回回舊厯所用節氣止泥一方且北直之
節氣春分秋分前後俱差一二日況諸方乎薄海內外盡知紕繆
矣可謂敬授民時之信厯也新法之推太陽出入地平環也則有
此晝而彼夜此入而彼出之理若舊法以一處而概諸方不明經
緯之奧故日月多應食而不食當食而失推五星當疾而反遲應
伏而反見種種差謬難以枚舉今以臣局新法所有諸方節氣太
陽出入晝夜時刻俱照道理遠近推算共增數葉加於厯首以協
民時以前民用裝潢告成恭呈王覽舊於厯尾附列五官等職名

今用新法不係監官推算亦應更改庶於大典有光攝政睿親王諭新厯節氣交脫與太陽出入晝夜時刻按道理遠近推算諸方各有不同果爲精確但字畫細小行款稠密宜更定式樣以便頒行瀋陽改寫盛京厯尾五官等官職名既係舊例著附列湯若望之後仍取該監更定厯樣呈覽○招撫山西應襲恭順侯吳惟華啟報山西代州歸順○工科給事中朱鼎藩啟言從來撫按鎮道各有職掌今總管官位敵王侯脅令監司以下悉行屬禮剛愎自用全無和衷之誼其鎮委添設各弁擾民滋害挾制有司致使畏縮不能盡職是地方有官而無官民未蒙福而先受害也請嚴飭各鎮道臣文專理民武專緝賊民失撫字罪文賊縱剽掠罪武仍責令撫按嚴覈不時糾參其濫委雜弁盡行斥革各州縣土寇竊發小者守令緝捕大者撫鎮剿除庶權一而法行矣攝政睿親王

從之○丁未兵部左侍郎劉餘祐以京東土寇竊發請移順天巡撫駐密雲薊州道駐遵化攝政睿親王從之又啟薦故明尙書仇維禎等八人下吏部知之○戊申兵部右侍郎金之俊啟劾通州道鄭輝優游養寇勦撫無聞三關鎮臣郝之潤借名誅僞縱兵肆掠請趣畿南北按臣及監司以下官速補赴任攝政睿親王令解輝之潤任仍諭御史叱馭星馳毋稍觀望其地方緊要員缺吏部速與銓補○庚戌順天巡撫宋權請行久任考成之法下部知之○辛亥工部左侍郎葉初春以新鑄制錢每七文作銀一分錢價日增民未稱便請頒內庫舊鑄當五制錢並鑄當二錢以濟民用不允○壬子攝政睿親王令南來副將韓拱薇參將陳萬春等齎書致史可法曰予向在瀋陽卽知燕山物望咸推司馬及入關破賊得與都人士相接見識介弟於清班曾託其手勒平安拳致衷

緒未審以何時得達比聞道途紛紛多謂金陵有自立者夫君父之讐不共戴天春秋之義有賊不討則故君不得書葬新君不得書卽位所以防亂臣賊子法至嚴也闖賊李自成稱兵犯闕手毒君親中國臣民不聞加遺一矢平西王吳三桂介在東陲獨效包胥之哭 朝廷感其忠義念累世之宿好棄近日之小嫌爰整貔貅驅除狗鼠入京之日首崇懷宗帝后諡號卜葬山陵悉如典禮親郡王將軍以下一仍故封不加改削勳戚文武諸臣咸在朝列恩禮有加耕市不驚秋毫無擾方擬秋高氣爽遣將西征傳檄江南聯兵河朔陳師鞠旅勦力同心報乃君國之仇彰我 朝廷之德豈意南州諸君子苟安旦夕弗審事機聊慕虛名頓忘實害于甚惑之國家之撫定燕都乃得之於闖賊非取之於明朝也賊毀明朝之廟主辱及先人我國家不憚征繕之勞悉索敵賦代爲雪

恥孝子仁人當如何感恩圖報茲乃乘逆寇稽誅王師暫息遂欲
雄據江南坐享漁人之利揆諸情理豈可謂平將以謂天塹不能
飛渡投鞭不足斷流耶夫闖賊但爲明朝祟耳未嘗得罪於我國
家也徒以薄海同仇特申大義今若擁號稱尊便是天有二日儼
爲勍敵予將簡西行之銳轉旆東征且擬釋彼重誅命爲前導夫
以中華全力受制潢池而欲以江左一隅兼支大國勝負之數無
待蓍龜矣予聞君子之愛人也以德細人則以姑息諸君子果識
時知命篤念故主厚愛賢王宜勸令削號歸藩永綏福祿 朝廷
當待以虞賓統承禮物帶礪山河位在諸王侯上庶不負 朝廷
仗義討賊興滅繼絕之初心至南州羣彥翩然來儀則爾公爾侯
列爵分土有平西之典例在惟執事實圖利之晚近士大夫好高
樹名義而不顧國家之急每有大事輒同築舍昔宋人議論未定

兵已渡河可爲殷鑒先生領袖名流主持至計必能深惟終始甯
忍隨俗浮沈取舍從違應早審定兵行在即可西可東南國安危
在此一舉願諸君子同以討賊爲心毋貪一身瞬息之榮而重故
國無窮之禍爲亂臣賊子所笑于實有厚望焉記有之惟善人能
受盡言敬布腹心佇聞明教江天在望延跂爲勞書不宣意可法
旋遣人報書語多不屈書曰大明國督師兵部尚書兼東閣大學士史可法頓首謹啟
下南中向接好音法隨遣使問訊吳大將軍未敢遽通左右非委
隆義於草莽也誠以大夫無私交春秋之義今倥偬之際忽捧琬
琰之章眞不啻從天而降也循讀再三殷殷致意若以逆賊尙稽
天討煩貴國憂法且感且愧懼左右不察謂南中臣民偷安江左
竟忘君父之怨敎爲貴國一詳陳之我大行皇帝敬天法祖勤政
愛民眞堯舜之主也以庸臣誤國致有三月十九日之事法待罪
南樞救援無及師次淮上因問達來地坼天崩山枯海泣嗟乎人
孰無君雖肆法於市朝以爲泄泄者之戒亦奚足謝先皇帝於地
下哉爾時南中臣庶哀慟如喪考妣無不拊膺切齒欲悉東南之
甲立翦兇仇而二三老臣謂國破君亡宗社爲重相與迎立今上
以繫中外之心今上非他神宗之孫光宗猶子而大行皇帝之兄
也名正言順天與人歸五月朔日駕臨南都萬姓夾道歡呼聲聞
更律衆

數里羣臣勸進今上悲不自勝讓再讓三僅允監國迨臣民伏闕
 屢請始以十五日正位南都從前鳳集河清瑞應非一卽告廟之
 日紫雲如蓋祝文升霄萬目共瞻欣傳盛事大江湧出栴梓數十
 萬章助修宮殿豈非天意也哉越數日遂命法視師江北刻日西
 征忽傳我大將軍吳三桂借兵貴國破走逆成爲我先皇帝后發
 喪成禮掃清宮闕撫羣黎且罷薙髮之令示不忘本朝此等舉
 動震古燦今凡爲大明臣子無不長跪北向頂禮加額豈但如明
 諭所云感恩圖報已乎謹於八月薄治筐篚遣使犒師兼欲請命
 鴻裁連兵西討是以王師既發復次江淮乃辱明誨引春秋大義
 來相詰責善哉乎推言之然此文爲列國君薨世子應立有賊未
 討不忍死其君者立說耳若夫天下共主身殉社稷中原鼎沸倉卒
 變非常而猶拘牽不卽位之文生昧大一統之義中春秋其間特書
 出師將何以維繫人心號召忠義紫陽綱目踵事春秋其間特書
 如莽移漢鼎光武中興丕廢山陽昭烈踐阼懷愍亡國晉元嗣基
 徵欽蒙塵宋高續統是皆於國仇未報之日亟正位號綱目未嘗
 斥爲自立率以正統予之甚至元宗幸蜀太子卽位號武議者或
 之亦未嘗不許以行權幸其光復舊物也本朝傳世十六正統相
 承自治冠帶之族繼絕存亡仁恩遐被貴國昔在先朝夙膺封號
 載在盟府甯不聞乎今痛心本朝之難驅除亂逆可謂大義復著
 於春秋矣昔契丹和宋止歲輸以金緡回紇助唐原非利其土地
 況貴國篤念世好兵以義動萬代瞻仰在此一舉若乃乘我艱難
 棄好崇仇窺此幅員爲德不卒是以義始而利終爲賊人所竊
 笑也貴國豈其然往先帝軫念演池不忍盡戮勸撫互用貽誤至
 今今上天縱英武刻刻以復仇爲念廟堂之上和衷體國介冑之

士飲泣枕戈忠義民兵願爲國死竊以爲天亡逆國當不越於斯時矣語曰樹德務滋除惡務盡今逆賊未服天誅謀知捲土西秦方圖報復此不獨本朝不共戴天之憾抑亦貴國除惡未盡之憂伏乞堅同仇之誼全始終之德合師進討問罪秦中共梟逆賊之頭以洩數天之憤則貴國義聞昭耀千秋本朝國報惟力是視從此兩國世通盟好傳之無窮不亦休乎至於牛耳之盟則本朝使臣久已在道不日抵燕奉盤盂從事矣法北望陵廟無涕可揮身蹈大戮罪應萬死所以不卽從先帝者實爲社稷之故傳曰竭股肱之力繼之以忠貞法處今日致命遂志克盡臣節○裁六部蒙古侍郎○以巴山爲工部侍郎由理事官遷○以王文奎爲右副都御

史巡撫保定

由內弘文院學士遷

羅繡錦爲右副都御史巡撫河南

由內國史院學

士

○設京城巡捕南北營參將二把總十巡兵二千名以兵部主

事一員督之○癸丑雨雹○太常寺請於仲秋祭社稷攝政睿

親王諭俟聖駕至京南郊禮成後奏行○甲寅攝政睿親王

諭官民人等曰書有云惟后非賢不父故帝王圖治必勞於求賢

而逸於任人得賢則治理雍熙不得賢則民生憔悴予所以展轉

夙夜寤寐思服者皆深爲斯世慮也近見廷臣所舉類多明季舊吏及革職廢員未有肥遯山林隱迹逃名之士豈謂前朝官吏無補於清時廢員沈淪鮮資於經濟但其中有賢有不肖惟在舉薦之人公與不公耳舉主公則所薦必賢社稷蒼生並受其福舉主不公則結連黨與引進親朋或受私賄或受屬託混淆名實標榜虛聲誤國妨賢莫此爲甚自今以後須嚴責舉主所舉得人必優加進賢之賞所舉舛謬必嚴行連坐之罰至於薦舉本章止許開具鄉貫履歷其才品所宜應聽朝廷定奪不許指定某官坐名何地無論貴賤遠近隱顯升沈果有灼見眞知悉許薦舉儻以賢郎雜流市傭村吏及革黜青衿投閒武弁妄充隱逸以致流品不分選法壅滯如前朝保舉故轍咎有所歸若畏避連坐因而緘默不舉者亦必治以蔽賢之罪○諭都察院六科十三道曰舊制政

事悉歸六部而復設都察院及科道衙門者所以繩愆糾繆匡正
闕失法至善也爾等既職司風紀爲朝廷耳目之官一有見聞卽
當入告凡貪污枉法暴戾殃民者指實糾參方爲稱職近觀爾等
未嘗明舉一清廉持正之賢未嘗明劾一受賄貪賊之輩然則朝
廷設立風憲衙門亦復何益自今以後凡六部卿寺堂屬大小官
員爾等宜從公舉劾直言無諱賢者則實稱其賢內勿避親外勿
避仇不肖者卽實指其不肖勿徇私情勿畏權勢詩不云乎柔亦
不茹剛亦不吐果能如此則升賞有加垂名不朽儻黨同伐異誣
陷私仇門戶相持援引朋類必寘重法○順天巡按柳寅東啟言
民間疾苦二事一驛遞累民近畿爲最法莫善於按地派銀召募
給養莫不善於按地派差貧富俱困請速議徵銀召募俾小民得
以息肩一解京錢糧頭緒紛雜擾累滋多有一縣正額三千餘兩

而起解分四十餘項者有一項錢糧止一兩六七錢而解費至三十兩者請總計各款分四季解府彙解戶部俾免賠累下戶兵二部酌議○以故明諸帝后遺像同厯代帝后像藏通集庫○令故明妃嬪各帶內使侍女一二人於空閒府第居住戶部量給養贍並設守護○是月興乾清宮工

八月丙辰朔日有食之是日令大學士馮銓同湯若望攜窺遠鏡等儀器率局監官生齊赴觀象臺測驗其初虧食甚復圓時刻分秒及方位等項惟西洋新法一一脗合大統回回兩法俱差時刻云○招撫山西應襲恭順侯吳惟華陳征西五策言晉民雖切歸順而賊設僞官據城抗命者如陳永福南夢雲王安民之類實繁有徒臣一面率兵進取忻定但恐孤軍力弱猝難決勝請發重兵出關合力驅剿庶晉地指日可平一也平西王吳三桂與賊有不

共戴天之讐大學士洪承疇素爲三秦將吏所服乞專命二臣統
旅西征則三秦軍民畏威懷德撲滅賊焰可計時而待二也賊聞
我兵西征必集眾據守河口我師爭渡非萬全之道宜令大兵一
支徑趨蒲津與賊相持別遣大兵一支從保德渡河卽由延安激
城邠陽等處直搗腹心俟賊勢內潰我兵飛渡蒲津長驅大進則
長河失險賊勢坐困三也我兵兩路渡河須更發精兵數萬並調
口北卜套各屬蒙古兵先期由邊外渡河套自延甯接界入口從
長安西路截擊會兵關中則三秦望風震動兼可斷賊西奔之路
四也賊之長技惟在依山傍險埋伏詐誘又慣乘夜劫寨偷營乞
敕各將領凡遇山林險隘搜剿埋伏向晚安營則必分番直更使
賊狡黠莫施掃蕩可必五也攝政睿親王諭大兵西征今將抵晉
吳惟華其益盡心勦賊共建奇勳○刑科給事中孫襄陳刑法四

事一曰定刑書刑之有律猶物之有規矩準繩也今法司所遵及故明律令中科條繁簡情法輕重當稽往憲合時宜斟酌損益刊定成書布告中外俾知畫一遵守庶奸慝不形風俗移易一曰存國體刑不上大夫乃古者貴貴之義請自今文官犯罪先下吏部覈議如所坐重大必請旨革職後方送刑部問擬武官隸兵部亦如之在外府州縣各官被參革應逮問者行該撫按就近提訊具獄報讞法司俱於爰書覆覈不必徑行勾攝則士氣伸國體立一曰禁刁訟比來風俗儇薄奸民健訟攫利嫁禍爲害滋多請申飭內外各衙門凡已經審結之案非係奇冤積枉不得復起葛藤重滋株累至於旁觀出首多屬傾誣百姓告訐官長尤爲刁悖且民間婦女輒拘訊公庭亦傷廉恥之化俱乞嚴禁所全者多一曰蘇滯獄邇治之世囹圄空虛晚季刑繁獄重上千天和甚非古人明

慎用刑之意請敕法司各衙門務以清獄省刑爲第一義非事關重大不得繫獄仍敕各撫按不時親詣郡邑躬行查覈卽獄犯之多寡定有司之仁暴庶可漸幾刑措之治攝政睿親王諭令法司官會同廷臣詳繹明律參酌時宜集議允當以便裁定成書頒行天下啟內各款悉如議通行嚴飭○丁巳 上以將遷都燕京以正黃旗內大臣何洛會爲盛京總管鑲黃旗梅勒章京阿哈尼堪統左翼正紅旗梅勒章京碩詹統右翼鎮守盛京以傅喀納爲雄耀城城守官梭木拜爲錦州城守官額蒙格爲甯遠城守官拜椿喀爲鳳凰城城守官胡世塔爲興京城守官愛湯阿爲義州城守官丹達禮爲新城城守官伊勒慎爲牛莊城守官青善爲岫巖城城守官○戊午故明山西偏關副將王世明西路偏頭關副將馬世榮降○己未有王崇高者曾爲人僕捐貲造泥溝坡橋成事聞

上嘉之令以人償伊主出戶爲民賞銀百兩復其家仍命樹碑其所○庚申允戶部議內官監屬各廠地畝租銀歸併有司徵收另項起解以清冒破騷擾等弊○辛酉先是大學士希福路遇固山額真譚泰曰爾果衰邁矣後又適谷巴達科爾可代向譚泰言我兩處房屋俱遠可將哈談巴圖魯房屋更換與我爾爲固山額真卽主張另撥一房有何不可爾誠衰邁矣譚泰適恩格德謂希福曰前路遇時曾謂我衰邁退縮今又謂我衰邁如果衰邁退縮爾當明言我卽悛改希福答曰我所以言固山額真者有二有比伊口利之人每占伊先伊遂巡居後伊非固山額真耶分撥房屋何爲推諉於人其得美房者曰誰分撥此房其不得美房者亦曰誰分撥此房伊爲何碌碌因人耶曾有一人覲面斥我伊豈不知耶伊兄係超等公爵我家恩遇亦不殊伊家乃公歿後已追封王

爵異姓封王原無成例且伊之官爵亦非襲自他人乃伊以偉畧
丈夫所得之官爵也奈何不侃侃而言也又梅勒章京譚布往詣
希福所希福謂之曰我至署中大學士范文程云日食二十筵我
因曰我等儒臣豈比於六部大臣及開疆闢土功臣而盛設若此
隨率范文程剛林啟之攝政睿親王王云此言誠是乃予誤也譚
布以是言白於伊兄譚泰譚泰訐於法司及問希福言王並無予
誤之語則是希福私意造言自稱其能以王爲誤假言招搖也又
問有一人覲面見斥者爲誰先稱並無其人後言護軍統領圖賴
因禮部官於攝政王處啟事錯誤乃於眾大臣前讓之云爾等密
勿大臣既知之何不力阻而令其啟王也於是法司議希福僞傳
王言固山額真譚泰護軍統領圖賴皆國家大臣乃謂譚泰衰邁
退縮碌碌因人其意非欲二臣構釁疏遠於王卽從此紊亂國政

耶希福應論死敗知攝政睿親王王念其效力年久且其姪索尼亦蒙主眷今復爲國效力最多希福免死革職爲民歸本牛菜止許往來親戚之家若在大臣之家行走從重治罪○攝政睿親王以書招僞總兵唐通馬登洪○王戌招撫山東河南侍郎王鰲永啟薦故明工部尙書曹珖刑部侍郎潘士良總漕郭尙友等三十二人下吏部知之○癸亥攝政睿親王諭官民人等曰政貴有恒辭尙體要以後一應章奏勿得拘牽文義摭拾浮詞俱將時宜事務明切敷陳蓋語繁而支則難聽言簡而當則易行言之有益無益不在繁簡願力行何如耳自今遇有切於時務者隨便入告不必等待多款以遲延國家利益之事早行一日則受一日之福遲行一日則受一日之病惟以迅速爲尙耳至明季各項稅課除已經征收不必給還外凡有虧欠俱予蠲免又府州縣衛所鄉村

十家置一甲長百家置一總甲凡遇盜賊逃人奸宄竊發事故鄰右卽報知甲長甲長報知總甲總甲報知府州縣衛府州縣衛覈實申解兵部若一家隱匿其鄰右九家甲長總甲不行首告俱治以重罪不貸○乙丑順天督學御史曹溶啟言請將遼東等處十五學改附永平府設教官三員分司教導擇遼地經明行修之士充其任其拔貢廩給事宜仍與各州縣一體舉行攝政睿親王從之○故明山西總兵王越降○丙寅葬 大行皇帝於 昭陵○故明宣大總兵張致雄降○戊辰免直隸被賊殘破景州河間阜城青縣本年額賦○山東萊州府知府黃紀啟言大兵自晉臨秦賊勢不支必走漢中奔西蜀竄踞一方所關甚鉅請令該部將見在京師蜀中舊弁陳聯芳盧進忠簡化龍李芝秀四人檄發陝西軍前俾相機先馳入蜀徵廢將連鄉勇號召土司與在籍諸臣秦

良玉等勦力前進不惟窮寇成擒西蜀底定滇黔楚粵之間不煩一旅而定矣攝政睿親王令陳聯芳等詣內院面詢方畧具啟○己巳定在京文武官員支給俸祿柴直仍照故明舊例○庚午遣禮部侍郎藍拜等詣房山祭金帝陵○壬申攝政睿親王諭兵部曰各地方歸順文武官員多有首鼠兩端觀望形勢陽爲歸順而中懷二心者此等之人徒取罪戾雖有顯績亦難自贖自今以後果能痛革前非矢誠無二仍與優敘至無知小民或乘亂作奸或畏罪爲賊悉赦前愆許令自新樂業若怙惡不悛定卽誅剿不宥○癸酉攝政睿親王諭戶部曰東來之人借鬻人獲名色擾害地方特行嚴察究治但小民恃貿易爲生未便禁止惟當設立科條使之遵守以後人獲止許於京師揚州濟甯臨清四處開肆貿易一應滿漢人民或商或賈各聽其便儻市易不平致行搶奪以及

虧直勒買等項地方官卽執送京師治罪○甲戌遣河南山東山西督撫道府等官赴任攝政睿親王諭以體國愛民各給銀兩有差○乙亥 車駕發盛京○辛巳順天督學御史曹溶啟薦故明進士王崇簡等五人招撫山西應襲恭順侯吳惟華薦故明國子監司業朱之俊等四人俱下吏部酌用○壬午故明大學士謝陞赴召至京師令入內院辦事陞以年老乞歸慰留之○順天督學御史曹溶啟請旌表故明殉節大學士范景文戶部尙書倪元璐左都御史李邦華兵部侍郎王家彥刑部侍郎孟兆祥及子進士章明左副都御史施邦耀大理寺卿凌義渠左春坊周鳳翔左中允劉理順左諭德馬世奇太常寺少卿吳麟徵檢討汪偉太僕寺丞申佳允給事中吳甘來御史王章陳良謨陳純德吏部主事許直兵部主事金鉉成德新樂侯劉文炳宣城伯衛時春新城伯王

國興惠安伯張慶臻駙馬都尉登永固錦衣衛指揮同知李若璉
千戶高文採等二十八人攝政睿親王令俟天下平定再行察議
○故明朔州副將杜國慶水泉營參將李正馥馬站堡參將蘭應
魁降○癸未 車駕次廣甯○設故明十三陵司香官及陵戶給
以香火地畝仍諭以虔潔禋祀禁止樵牧用稱國家隆禮前朝至
意○甲申攝政睿親王諭戶部凡鰥寡孤獨一切困窮無告者許
其赴部陳告量給贍養

九月丁亥攝政睿親王諭京城內外軍民人等曰予至此四月以
來無日不與諸臣竭盡心力以圖國治民安但寇賊倡亂之後眾
心驚懼六月間流言蜂起隨經頒示曉諭民心乃甯向傳有八月
屠民之語今八月已終毫末驚擾則流言之不足信也明矣今聞
謠傳九月內 聖駕至京東兵俱來放搶三日盡殺老壯止存孩

赤等語民乃國之本爾等既已誠心歸服復以何罪而戮之爾等
試思今 皇上攜帶將士家口不下億萬與之俱來者何故爲安

燕京軍民也昨將東來各官內命十餘員爲督撫司道正印等官
者何故爲統一天下也已將盛京帑銀取至百餘萬後又輓運不
絕者何故爲供爾京城內外兵之用也且予不忍山陝百姓受害
既已發兵進剿猶恨不能速行平定救民水火之中豈有不愛京
城軍民而反行殺戮之理耶此皆眾所目擊之事餘復何言其無
故妄布流言者非近京土寇故意搖動民情令其逃避以便乘機
搶掠則必流賊奸細潛相煽惑貽禍地方應頒示通行曉諭以安
眾心仍諭各部嚴緝奸細及煽惑百姓者儻有布散流言之人知
卽出首以便從重治罪若見聞不首者與散布流言之人一體治
罪○以岱都爲工部侍郎由刑部選○刑部右侍郎提橋啟言修

明律令需人甚急請令內院酌議遴選各衙門官爲總裁爲分校
剋期刊定頒式天下攝政睿親王諭各衙門中有材識通明熟諳
律令者著堂官開送內院酌派具啟○戊子令故明光宗襄嬪張
氏與任貴妃同居戶部量給養贍○兵部右侍郎金之俊啟請收
民間兵器馬匹入官攝政睿親王以民間兵器藉以禦盜不允○
己丑調党崇雅爲刑部左侍郎由戶部調以李化熙爲工部右侍郎明故
侍郎○禮部啟言 聖駕至京文武百官迎接禮儀應行豫定先
期工部錦衣衛修治道途設行殿於通州城外南向司設監設帷
幄 御座於中尙衣監備冠服錦衣衛設鹵簿儀仗旗手衛設金
鼓旗幟敎坊司設大樂俱於行殿西候 駕至前導先期一日傳
報文武百官俱吉服於行殿西道旁百步之外候 駕過侍班跪
接 駕入行殿升 御座鴻臚寺官贊排班文武各官班齊行五

拜三叩頭禮畢候 上更衣百官前行 駕由永定門入大清門
升武英殿文武百官由大清門左右進至承天門外金水橋南文
武分班 駕至跪迎俯伏候 駕過百官各散凡一應執事人員
仍伺候次日黎明文武百官於武英殿朝畢上表請卽 帝位候
旨俞允本部隨擇日具儀注進呈攝政睿親王是之○辛卯攝政
睿親王諭城堡營衛文武各官及軍民人等曰予聞爾等遭茲寇
難坐臥靡甯嚴整大軍埽除禍亂拯民水火之中以安天下非好
兵而樂戰也爾等但備辦糧草齎送軍前此外秋毫不擾城市村
莊人民各照常安居貿易毋得驚惶凡文武官員軍民人等不論
原屬流賊或爲流賊徇勒投降者若能歸誠我朝仍准錄用儻抗
拒不服置之重法妻子爲奴開城投順者加升一級恩及子孫有
能擒獻賊渠將佐者論功優升永同帶礪今 皇上求賢若渴凡

有深識天時懷材抱德之士亟宜奮起共立功名遲疑失時噬臍無及○河道總督楊方興啟言宿遷左連清桃右連徐邳地居要衝宜設道員駐紮以備非常更設重兵以舊總兵官統之庶要地得人眾心安輯攝政睿親王以兵部啟心郎趙福昌爲宿遷兵備道其添兵事宜令部議覆○招撫山東河南侍郎王鰲永啟言楊威條故明總兵劉澤清委用之官澤清南奔威遂盤踞登萊假稱山東前鋒恢勦副總兵名色肆行焚戮乞敕大兵速勦以杜亂萌從之○癸巳平定山西固山額真葉臣覺羅巴哈納石廷柱等啟言故明兵部尙書張縉彥已遣人招至縉彥自言有死罪不敢入朝其開封衛輝懷慶等府業已委官署事並酌留官屬兵丁駐防○鎮守眞順廣大署總兵官王燝啟言流寇僞將王鼎鉉占據內黃縣城勾結土寇蘇自興等各稱總督大元帥並聯山東河南賊

寇勢將燎原臣會同道臣邱茂華提兵南下至隆平擒獲巨寇劉致和等至鉅鹿擒獲擅立天定年號僞總兵劉守分等俱已伏法所過之地目擊廬舍焚毀遺民無幾臣按兵三日宣諭招撫仍分遣將士直抵諸巢殺獲甚眾下兵部知之○甲午 車駕入山海關駐蹕西河總兵官高第永平道李丕著迎 駕 上諭曰爾等所屬地方兵民孤寡宜加軫恤各安其心隨後我軍搬移家口接踵將至各有章京統領爾等曉諭商民毋得再於城內交易但在城外互市如有搶奪者可卽拏送該管章京毋徇情面○丙申刑部右侍郎提橋啟言五刑之設所以詰奸除亂而死刑居二曰絞曰斬明律分別差等絞斬互用我朝法制罪應死者俱用斬刑臣以爲自今以後一切麗於重典者仍分別絞斬按律引擬至於應笞之人罪不至死若以板易鞭或傷民命宜酌減笞數以三鞭准

一板庶得其中伏懇敕下臣部傳示中外一體遵行從之○刑部
尚書管侍郎事田唯嘉以衰病乞休允之○丁酉 上駐蹕永平
知府馮如京副將張維義等迎 駕 上諭曰爾等各安心軫恤
所屬軍民人等愛養孤貧俾其得所嚴查各屬遇有一二逃人獲
時卽行解京儻隱匿不解被原主識認或被旁人告發所屬官員
從重治罪窩逃之人置之重刑仍傳諭山海關曉示各屬○己亥
建 堂子於玉河橋東○庚子僞定西伯唐通降○辛丑遣梅勒
章京和託李率泰額孟格等率甯遠駐防兵定山東河南○禮部
啟言故明襄陵王朱達棧投誠赴京請敕戶部支給銀米從之○
癸卯 上駐蹕通州攝政睿親王多爾袞率諸王貝勒貝子公文
武羣臣迎 駕 上遣人賜王鞍馬一王跪受訖偕諸王至通州
見 上跪候 駕過 上至行殿設儀仗奏樂對 天行三跪九

叩頭禮畢 上升 御座睿親王率出師諸王貝勒文武各官先

詣 皇太后前行三跪九叩頭禮次詣 上前行三跪九叩頭及

抱見禮畢各退班眾漢官亦各行禮而退○甲辰 上自正陽門

入宮○乙巳平定山西固山額真葉臣等奏潞澤所屬州縣俱委

員管理有董學禮者原係故明副將降賊受職駐紮懷慶後爲我

軍擊敗遁往潼關以書招之學禮遂降願率兵駐防黃河西岸因

給與總兵劄付又少林等五寨賊首李際遇明季屢攻不克授以

總兵職銜後與劉賊相持我兵至懷慶差人招撫卽將所據一府

二州十二縣大小山寨千餘兵二十七萬齎書來降僞定西伯唐

通敗降後我軍復攻破流賊原籍米脂縣殲其親族掘其墳墓棄

其骸骨偵得流寇黨羽俱經星散報聞○丙午賜攝政睿親王多

爾袞貂蟒朝衣一襲○丁未賜削爵肅親王豪格及武英郡王阿

濟格豫親王多鐸貝勒尼堪貝子博洛平西王吳三桂恭順王孔有德懷順王耿仲明智順王尚可喜續順公沈志祥故明晉王朱審煊等貂蟒朝衣各一襲○己酉金星晝見○庚戌攝政睿親王多爾袞率諸王及滿漢文武官員上表請登大寶以慰臣民得旨覽王奏具悉忠君愛國情義篤摯恭率文武羣臣勸登大寶尤見中外同心共相擁戴特允所請於十月初一日卽位用慰王等廓清枚甯之意○大學士馮銓謝陞洪承疇等奏 郊廟及 社稷樂章前代各取佳名以昭一代之制除漢魏曲名各別不可枚舉外梁用雅北齊及隋用夏唐用和宋用安金用甯元宗廟用甯郊社用成明廟用和本朝削平寇亂以有天下擬改用平字 郊祀九奏迎神奏始平奠玉帛奏景平進俎奏咸平初獻奏壽平亞獻奏嘉平終獻奏雍平撤饌奏熙平送神奏太平望燎奏安平 宗

廟六奏迎神奏開平初獻奏壽平亞獻奏嘉平終獻奏雍平撤饌
奏熙平送神奏成平 社稷七奏迎神奏廣平初獻奏壽平亞獻
奏嘉平終獻奏雍平撤饌奏隆平送神奏成平望燎奏安平從之
○招撫江南副將唐起龍奏臣抵清河口聞南來總兵陳洪範已
到王家營臣隨見洪範備頌大清恩德並齋敕緣由洪範叩接敕
書開讀訖所齋進奉銀十餘萬兩金千兩段絹萬疋其同差有兵
部侍郎左懋第太僕寺卿馬紹愉臣先差官趙鉞馳報卽同洪範
北上其行間機密到京另奏報聞○壬子恭奉 太祖武皇帝
孝慈武皇后 大行皇帝神主奉安 太廟

冬十月乙卯朔 上親詣 南郊告祭 天地卽皇帝位○遣官

祭告 太廟 社稷初頒時憲曆○丙辰吏部議覆山東巡撫方

大猷奏請以孔子六十五代孫孔允植仍襲封衍聖公照原階兼

太子太傅其子興變照例加二品冠服孔允鉅顏紹緒曾聞達孟聞璽仍襲五經博士衍聖公保舉曲阜知縣孔貞堪仍爲原官其在汶上縣管聖澤書院事世襲太常寺博士應以衍聖公第三子承襲至尼山書院洙泗書院及四氏學錄等官俱照舊留用管句司樂掌書等缺聽衍聖公咨部補授從之○給事中郝傑奏從古帝王無不懋修君德首重經筵今皇上睿資凝命正宜及時典學請擇端雅儒臣日譯進大學衍義及尙書典謨數條更宜遵舊典遣祀闕里示天下所宗得旨請開經筵祀闕里俱有神新政俟次第舉行○戶部左侍郎鄧常春緣事革職○丁巳以攝政王多爾袞功最高命禮部尙書郎球侍郎藍拜啟心郎渥赫建碑紀績○辛酉上大行皇帝尊諡曰應天興國弘德彰武寬溫仁聖睿孝文皇帝廟號太宗告祭郊廟社稷頒詔天下○壬

戎梅勒章京和託等奏臣等率師至山東流賊旗鼓趙應元等詐
降入青州殺招撫侍郎王鰲永據其城臣等率師往援擒斬應元
等復青州○甲子 上御皇極門頒詔天下詔曰我國家受 天
眷佑肇造東土 列祖勗興宏業 皇考式廓前猷遂舉舊邦誕
膺新命迨朕嗣服雖在冲齡締念紹 庭永綏厥位頃緣賊氛洊
熾極禍中原是用倚任親賢救民塗炭乃方馳金鼓旋奏激清旣
解倒懸非富天下而王公列辟文武羣臣暨軍民耆老合詞勸進
懇切再三乃於今年十月初一日祇告 天地 宗廟 社稷卽
皇帝位仍建有天下之號曰大清定鼎燕京紀元順治緬維峻命
不易勗業尤難況當改革之初更屬變通之會是用準今酌古揆
天時人事之宜庶幾吏習民安新 祖功 宗德之大所有合行
條例臚列如左一親王佐命開國濟世安民有大勳勞者宜加殊

禮以篤親賢應行典儀部院大臣集議具奏一親郡王子孫弟姪應得封爵該部通察往例損益折衷具奏一滿洲開國諸臣或運籌帷幄決勝廟堂或汗馬著勳開疆展土俱應加封公侯伯世爵錫之誥券與國咸休永世無窮一開國以來滿洲將領等官應得敘廕該部通察往例奏請施行一大兵入關以來文武官紳倡先慕義殺賊有功以城池歸順者該部通行察敘具奏一自順治元年十月初一日昧爽以前官吏軍民人等罪犯除謀反叛逆子孫謀殺祖父母父母妻妾殺夫奴婢殺家長殺一家非死罪三人採生折割人謀殺故殺真正人命蠱毒魘魅毒藥殺人強盜妖言及十惡至死罪者不赦外其餘已發覺未發覺已結正未結正罪無大小咸赦除之有以赦前事相告訐者以其罪罪之其隱匿在官及民間財物人口牲畜者許自首免罪如被人告發不在赦例一

朝廷高爵厚祿優養臣僚原欲其盡忠爲國國之安危全係官僚之貪廉官若忠廉則賢才向用功績獲彰庶務皆得其理天下何患不治官若奸貪則賄賂肆行庸惡倖進無功冒賞巨欸得以漏網良善必至蒙冤吏胥舞文小民被害政之紊亂實由於此自本年五月初一日以後凡在京大小衙門及在外撫按司道各府州縣鎮協營路軍衛等官並書吏班阜通事撥什庫糧長十季夜不收等役但有貪賄枉法剝削小民者照常治罪不在赦例一凡弁兵於行軍之際隱匿無主財物因而犯罪者盡行赦免一出征兵丁多歷勞苦其家口著該部厚加存恤一地畝錢糧俱照前朝會計錄原額自順治元年五月初一日起按畝徵解凡加派遼餉新餉練餉召買等項悉行蠲免其大兵經過地方仍免正糧一半歸順地方不係大兵經過者免三分之一就今年一年正額通算一

各直省起存拖欠本折錢糧如金花夏稅秋糧馬草人丁鹽鈔民屯牧地鹽課富戶門攤商稅魚課馬價柴直棗株鈔貫果品及內供顏料蠟茶芝麻棉花絹布絲綿等項念小民困苦已極自順治元年五月初一日以前凡未經徵收者盡行蠲免一京都兵民分城居住原取兩便實不得已其東中西三城官民已經遷徙者所有田地應納租賦不拘坐落何處概准蠲免三年以順治三年十二月終爲止其南北二城雖未遷徙而房屋被人分居者所有田地應納租賦不拘坐落何處准免一年以順治元年十二月終爲止一丁銀原有定額年來生齒凋耗版籍日削孤貧老幼盡苦追徵殊可憫念自今以後各撫按官嚴行有司細加查覈凡幼未成丁老殘未豁者悉與豁免一軍民年七十以上者許一丁侍養免其雜派差役八十以上者給與絹一疋綿一斤米一石肉十斤九

十以上者倍之有德行著聞爲鄉里所敬服者給冠帶榮身一窮民鰥寡孤獨篤廢殘疾不能自存者在京許兩縣申文戶部告給養濟在外聽該府州縣申詳撫按動支豫備倉糧給養務使人寔實惠以昭朝廷恤民至意一所在孝子順孫義夫節婦有司細加諮訪確具事實申該巡按御史詳覈奏聞以憑建坊旌表一所在神祇壇廟不係淫祠者有司務竭誠敬毋致褻慢明國諸陵仍用內員及陵戶看守撥給香火土地仍春秋致祭各處帝王陵寢及名臣賢士墳墓被人毀廢者卽與修理禁止樵牧一在京文官一品至九品在外方面各官及知府府佐州縣正官俱給與應得誥敕凡京外署職試職俱准實授仍給應得敕命文宣三品以上廕一子入監讀書京官八品以下准給本身敕命願移封移贈者聽一部院及各衙門辦事滿洲官員年勞深久該部通行察敘一山

林隱逸之士有懷才抱德堪爲世用及武畧出眾膽量過人者撫按據實舉薦該部覆覈徵聘來京以便擢用一前朝建言降謫諸臣果係持論公平有裨治理者吏部具奏召用其各衙門官有橫被誣陷公論稱冤曾經薦舉不係貪酷犯賊者並與昭雪敘用一應爲民者准復冠帶閒住者准致仕一會試定於辰戌丑未年各直省鄉試定於子午卯酉年凡舉人不係行止黜革者仍准會試各處府州縣儒學食廩生員仍准給廩增附生員仍准在學肄業俱照例優免一武舉會試定於辰戌丑未年各直省武鄉試定於子午卯酉年俱照例一京衛武學官生遇子午卯酉鄉試年仍准開科一體會試一京府並直省各府州縣學廩生貢額年分不等今正貢准改恩貢次貢准改正貢每處貢二名止行一年後不爲例有才華出眾孝弟著聞者不拘廩增附學俱許提學官特薦試

用一前朝文武進士文武舉人仍聽該部覈用一品官有三母三妻照前朝覃恩事例俱准封贈一品官妻已受封其次室亦准用本品冠帔束帶禮服一直省各學貧生聽地方官覈實申文該提學官於所在學田內動支錢米酌量賑給一國子監積分監生已經考定者卽與選授撥出厯事監生免厯二箇月其各衙門辦事官吏自大軍入京以來效有勤勞者聽該堂上官分別具奏應上卯者准與上卯應冠帶者量給冠帶一前朝宗室首倡投誠先來歸順赴京朝見者仍給祿養以昭朝廷興繼之意一在京在外武職官員應給封誥者照例給與三品以上仍准撰文一前朝勳臣及子弟有倡先投順仍立功績者與本朝諸臣一體敘錄應給封誥照例頒給其見有官職已經來朝者仍准投原職一在京錦衣等衛所及在外衛所官員已經歸順者俱准照舊供職其帶領兵

丁獻納地土倡先投誠者加一級歸順後立有功績者另行優敘
一在外營路將領等官有乘寇亂擾攘私帶在官兵丁馬匹自護
回家者准將原兵原馬照數交官前事免其追論一北直河南山
東節裁銀及山西太原平陽二府新裁銀應解兵部者前朝已經
免解其太原平陽二府舊裁及各府新舊節裁銀兩在本年五月
初一日以前者俱免解以後仍照見行事例分別蠲免一會同館
馬站驛站館夫及遞運所車站夫價等銀除本年五月初一日以
前免解外以後仍照例分別蠲免一有司徵收錢糧止取正數凡
分外侵漁秤頭火耗重科加罰巧取民財者嚴加禁約違者從重
參處一京師行商車戶等役一遇僉派頓至流離近年已經停報
嗣後永行除豁以蘇民困一各運司鹽法向來遞年加增有新餉
練餉及雜項加派等銀深爲厲商今盡行蠲免止照舊額按引徵

收本年仍免三分之一一關津抽稅原屬譏察非欲困商順治元年准通免一年自二年正月初一日以後方照明朝初額起稅凡末年一切加增盡行豁免其直省州縣零星抽取落地稅銀名色概行嚴禁一各處州縣有曾經兵災寇亂殘破地方其應納錢糧已經前朝全免者戶部察明彙奏仍與全免不在免半免一之例一柴炭錢糧向來派順天保定山西六十八衛所掌印官於軍餉扣除解兵部給發商人承辦今衛軍額餉久停前項銀兩戶部卽於應發軍餉內除出徑自招商辦買以供內廷烟爨各衛官不得朦朧私派一直省額解工部四司料銀匠價銀輒料銀雜銀車價銀輦夫銀輦課銀漁課銀野味銀翎毛銀活鹿銀大鹿銀小鹿銀羊皮銀弓箭撒袋折銀扣臘水腳銀牛角牛筋銀鷺翎銀天鷲銀民夫銀地租銀匠班銀缸罈銀樵炭銀蔴鐵銀斑竹銀白猪鬃

銀開夫銀梔子銀藍錠銀河夫銀椿草子粒銀狀元袍服銀衣糧
銀砍柴夫銀搬運木柴銀擡柴夫銀蘆課等折色銀盔甲腰刀弓
箭弦條胖襖褲鞋狐鹿兔狸皮山羊毛課鐵黃檀榔桑胭脂花梨
南棗榆杉條等木椶木桐木板枋冰窖物料蘆蓆蒲草榜紙葛罽
槐花烏梅梔子筆管芒苗荳帶竹埽蓆草粗細銅絲鐵綾鍍白銅
絲鐵條碌子青花棉松香光葉書籍紙嚴漆罩漆桐油毛筆柴水
斑等竹實心竹樅毛白圓籐翠毛石磨川二珠生漆荷葉廣膠焰
硝螺殼等本色錢糧自順治元年五月初一日以前逋欠在民者
盡予蠲免以甦民困自五月初一日以後仍照見行事例分別蠲
免一直省解屯田司助工銀一項原係加派錢糧准予豁免一各
直省運糧官役有因漂流挂欠並侵沒漕運錢糧見在收糧衙門
及原籍追比未完自本年五月初一日以前盡行免追釋放一直

省解官解戶領解錢糧被賊寇劫失在順治元年五月初一日以前者咸予豁免一山陝等處軍民人等有昔被流寇要挾今悔過自新傾心歸化於所在衙門投有降表及甘結文案可據者概從赦宥一直省各州縣土寇有賊首已經就擒脅從歸農復業及脅從共擒賊首赴所在官司連名自首者前罪並赦勿論一凡譌言妖術煽惑平民燒香聚眾偽造符契擁集兵仗傳頭會首已經緝獲正法其脅從人等果改邪歸正者前罪免論一向來勢家土豪重利放債折準房地以致小民傾家蕩產深可痛恨今後有司不許聽受賄屬代爲追比犯者以違制論一越訴誣告敗俗傷財已經嚴禁而有司奉行不力刁風未止自今大赦以後凡戶婚小事俱就有司歸結儻奸棍訟師誘陷愚民入京越訴者定加等反坐如刑部官不由通政司濫受民詞許科道糾參請旨究處一贖鍰

之設原開罪人自新之路向來有以追比罰贖反致傷生或以罰贖不完扳引代納甚爲民害嗣後一切禁止有力不能納者速與免追歸結一向來巡按官以訪拏爲名聽衙蠹開送誣害良民科取贓贖最爲敝政今後悉行禁革如地方大奸大惡賊窩盜穴及包攬詞訟詐財害眾者許訪察的確一面密奏一面嚴拏務盡除奸宄以安善良一人命至重歷朝有三覆奏之條而失出之罪輕於失入以後凡問刑官員毋執己見毋徇賄屬務在得情仍須勤敏速結毋致拖延苦累以干天和於戲 天作君師惟鑒臨於有德民歌父母斯說豫於無疆旣已諭旨布恩宏敷大賚將使投誠歸命無阻幽深惟爾萬方與朕一德播告遐邇咸使聞知○加封多爾袞爲叔父攝政王賜冊文曰 太祖武皇帝肇基鴻業垂裕後昆 太宗文皇帝嗣位西併蒙古東臣朝鮮擴土開疆顯庸勦

制 皇考命叔父攝政王征討元裔察哈爾國俘其后妃世子遷其邦族獲制誥玉寶又隨 皇考征朝鮮承領水師破江華島盡掠其國王眷屬遂平朝鮮各處征伐皆叔父倡謀出奇攻城必克野戰必勝叔父幼而正直義無隱情體國忠貞助成大業 皇考特加愛重賜以寶冊先封和碩睿親王又輔朕登極佐理朕躬歷思功德高於周公昔周公奉武王遺命輔立成王代理國政盡其忠孝皆武王已成之業我 皇考上賓之時宗室諸王人人覲覲有援立叔父之謀叔父堅誓不允念 先皇殊常隆遇一心殫忠精誠爲國又念 祖宗勦業艱難克彰大義將宗室不軌者盡行處分以朕係 文皇帝子不爲幼冲翊戴擁立國賴以安及乎明國失紀流賊竊位播惡中原叔父又率領大軍入山海關破賊兵二十萬遂取燕京撫定中夏迎朕來京膺受大寶此皆周公所未

有而叔父過之碩德豐功實宜昭揭於天下用加崇號封爲叔父攝政王錫之冊寶式昭寵異重念我叔父靖亂定策輔翊眇躬推誠盡忠克全慈孝中原賴以廓清萬方從而底定有此殊勳尤宜褒顯特令建碑紀績用垂功名於萬世復賜嵌十三顆珠頂黑狐帽一黑狐裘一金萬兩銀十萬兩段萬匹鞍馬十馬九十橐駝十○賜諸王文武羣臣宴○天津總督駱養性違旨擅迎南來左懋第陳洪範等部議應革職爲民得旨養性有迎降功革總督任仍留太子太保左都督銜○乙丑以雷興爲右副都御史巡撫天津出都察院副理事官遷○丁卯加封鄭親王濟爾哈朗爲信義輔政叔王賜冊寶黃金千兩白金萬兩綵段千疋復肅親王豪格爵賜冊寶鞍馬二空馬八晉封武英郡王阿濟格豫郡王多鐸俱爲親王賜冊寶鞍馬各二空馬各八貝勒羅洛宏爲衍禧郡王賜冊印鞍馬一

空馬二封碩塞爲承澤郡王賜冊印賜平西王吳三桂冊印白金萬兩鞍馬一空馬二賜恭順王孔有德懷順王耿仲明智順王尙可喜續順公沈志祥朝鮮國世子李滢次子李湜及滿洲蒙古漢軍固山額真梅勒章京護軍統領等鞍馬大宴○平定山西固山額真葉臣等奏臣等出固關進平三晉所至迎降有僞伯陳有福竊據太原我軍以紅衣礮攻之克其城安撫居民五州二十縣皆降○戊辰給事中郝傑奏自古有道之君久安長治鮮不親賢遠佞揆文則進一德之臣奮武則尙熊羆之士至刑餘宦寺特備灑掃供使令耳從不敢於大庭廣眾之中與朝臣齒明洪武初中官不許識字誠慎之也誠賤之也輒末寵任廠衛遂貽杜勳閻思印邈永清等開門迎賊之禍我國家深鑒往弊痛絕中官一切廠監錢糧悉歸有司遠邇臣庶無不歌頌迺者頒詔大典賜宴廷臣時

有內監數輩先行拜舞辱朝廷而羞當世莫此爲甚伏乞敕下禮部凡遇朝賀悉照舊典內監不得入班行禮尤有請者先朝原有牙牌舊制非獨別品級實以防奸僞也今應仍照品級懸帶至於雜流貲員不得濫越詞林科道侍從之前庶觀瞻肅而體統明於禮法所關非少得旨內監原未贊禮何得溷入朝班懸帶牙牌事宜著定議奏聞○辛未封貝子尼堪博洛俱爲多羅貝勒輔國公滿達海屯齊博和託屯齊喀和託尙善俱爲固山貝子○定諸王貝勒貝子公俸祿攝政王三萬兩輔政王一萬五千兩親王一萬兩郡王五千兩貝勒二千五百兩貝子一千二百五十兩鎮國公輔國公俱六百二十五兩○壬申以王公弼爲戶部右侍郎由通政使遷王極爲山東布政使參政管布政使事由山東濟南道僉事遷張士第爲山西布政使司參政管布政使事故明淮海道副使○以招撫山西應襲

恭順侯吳惟華有勦寇功命以原銜充鎮守太原等處總兵官○

癸酉命和碩英親王阿濟格爲靖遠大將軍帥師西討李自成○

甲戌以謝啟光爲戶部左侍郎總督倉場

故明南京兵部左侍郎

○乙亥刑

部左侍郎党崇雅奏臣謹按舊制凡刑獄重犯自大逆大盜決不待時外餘俱監候處決在京有熱審朝審之例每歲霜降後方請旨處決在外直省亦有三司秋審之例未嘗一麗死刑輒棄於市皆委曲爲冤民計也我皇上好生之心同揆先聖凡罪人之決不待時與秋後處決者望照例區別以昭欽恤更有請者在外官吏乘茲新制未定不無憑臆舞文之弊並乞暫用明律候國制畫一永垂令甲得旨人命至重豈容一概殺戮以後在京重大獄情詳審明確奏請正法在外仍照明律行如有恣意輕重等弊指參重處○丙子河南巡撫羅繡錦奏流寇二萬餘人渡黃河攻懷慶

府甚急於是遣學士詹霸馳赴英親王阿濟格軍諭之曰頃聞流賊急攻懷慶已命豫親王多鐸於是月二十五日率師南下便道往征豫親王如已克流寇卽遵諭仍赴南京如流寇聞風遁走豫親王卽追躡賊後直趨西安豫親王先至西安則勒兵以待爾等爾等先至亦宜待豫親王大師務合力攻勦平定賊寇勿以先至彼此遂不相待爾等須沿途探問消息若得豫親王擊敗流寇率師南下之信爾等仍遵前旨相機以行○戊寅檄諭河南南京浙江江西湖廣等處文武官員軍民人等曰爾南方諸臣當明國崇禎皇帝遭流賊之難陵闕焚毀國破家亡不遺一兵不發一矢如鼠藏穴其罪一及我兵進勦流賊西奔爾南方尙未知京師確信又無遺詔擅立福王其罪二流賊爲爾大讐不思征討而諸將各自擁眾擾害良民自生反側以啟兵端其罪三惟此三罪天下所

共憤王法所不赦用是恭承 天命爰整六師問罪征討凡各處
文武官員率先以城池地方投順者論功大小各升一級抗命不
服者本身受戮妻子爲俘若福王悔悟前非自投軍前當釋其前
罪與明國諸王一體優待其福王親信諸臣早知改過歸誠亦論
班次大小仍與祿養檄到之處民人無得驚惶農商照常安業特
茲曉諭咸使聞知○定攝政王冠服宮室之制帽頂用東珠十三
顆金佛前嵌東珠七顆後金花嵌東珠六顆帶每板嵌東珠六顆
貓睛石一顆帶用淺黃服用八團龍坐褥冬用貂皮夏用繡龍房
基高十四尺樓三層覆以綠瓦脊四邊俱用金黃瓦○己卯命和
碩豫親王多鐸爲定國大將軍率師征江南○甲申定諸王貝勒
貝子公等冠服宮室之制

十一月乙酉朔眞定巡按衛周允奏薦故明工部尙書劉遵憲兵

部尙書王在晉等十二人下吏部知之○大學士馮銓等奏翰林院明初原定正三品衙門後因詹事府有翰林三品四品官遂改爲五品今議暫罷詹事府仍宜復翰林院爲正三品原額官二十員學士一員今應正三品侍讀學士侍講學士各二員今俱應正四品侍讀侍講各二員今俱應正五品修撰三員仍應從六品編修四員仍應正七品檢討四員仍應從七品原缺俱於新舊翰林中查其資序才能通融補授再查翰林原額雖止二十員然明朝因職務殷繁又爲儲才之地將來備內閣宗伯少宰之選故用人多至三四十員不等會典開載以爲無定員正爲此也若庶吉士三年一選或二三十員亦無定數臨期請旨定奪詔敕房辦理典籍二員並首領官孔目一員俱應仍舊其博士五員侍書二員待詔六員舊不常設今應裁汰得旨翰林院著爲正三品衙門詹事

府並尙寶司衙門俱著裁去○少詹事管祭酒事李若琳奏賢才
者國之楨幹敎化者國之本源請將國子監倣明初之制官生除
大臣恩蔭入監外其餘自一品至七品子弟有勤敏好學原在庠
序者許提學官造冊送監民間貢生廷試坐監外其廩增附生
員中有文義優長壯年力學者亦許提學官考選送監臣等督課
畢業俟其有成奏請廷試授官抑學以國子監名所謂國之貴游
子弟學焉者也公侯伯駙馬初襲授者宜令奏送國學讀書一體
講習得旨滿洲官員子弟有願讀清書或願讀漢書及漢官子弟
有願讀清漢書者俱送入國子監仍設滿洲司業一員助教二員
敎習清書○僞宏光使臣陳洪範南還於途次具密啟請留同行
左懋第馬紹愉自願率兵歸順並招徠南中諸將攝政王令學士
詹霸等往諭勉其加意籌畫成功之日以世爵酬之遂留懋第紹

愉○丁亥河南巡撫羅繡錦奏故明兵部尙書張縉彥主事凌駟
不卽遵旨來京擁兵河上觀望游移人心驚惑副將郭光輔參將
郝尙周數調不援復叛從賊請速發兵靖亂得旨定國大將軍和
碩豫親王多鐸擒縉彥駟治以軍法光輔尙周著該撫拏問○禮
部侍郎李明睿以朝參行禮不恭革職○己丑兵部右侍郎金之
俊請禁止滿洲官役額外需索驛遞夫馬廩糧草料從之○朝鮮
叛將平安道都總兵官林慶業自石城島奉表歸誠得旨林慶業
原係逃亡本當重治今旣悔罪投誠姑免究○庚寅少詹事兼翰
林院侍讀學士掌院事胡世安少詹事管國子監祭酒事李若琳
以詹事府暫裁請辭詹事銜得旨胡世安著以翰林院侍讀學士
掌院事李若琳改授翰林院侍讀學士兼國子監祭酒事○宣府
巡撫李鑑奏故明巡撫朱之馮當聞賊臨城誓以死守力窮眾叛

遂自經於城上中北路通判朱敏泰聞賊西來知事無濟遂集父老於中堂封府庫解印綬自縊死生員姚時中作忠義詩書衣帶棄妻子縊於文廟總兵甯寵罵賊而死總兵董用文副將劉九卿死獄中知縣申以孝並子生員旺全家俱死請予旌卹下所司知之○辛卯故明石城島總兵馬登洪降○命廷試貢生上卷以知州用中次卷以州判縣丞敎職用○壬辰賜故明襄陵郡王朱魁圖白金衣服等物仍聽其自便○固山額真石廷柱奏臣同巴哈納席特庫等自汾州至平陽一帶追殺賊四千餘獲馬鹿千餘於西山寨降偽副將康元勳等三員兵三千餘名黑龍關降故明守備三員兵三千名○甲午定諸王貝勒貝子公等下護衛員數攝政王三十員一等十員二等十員三等十員輔政王二十三員一等七員二等七員三等九員和碩親王二十員一等六員二等六

員三等八員多羅郡王十五員一等六員二等四員三等五員多
羅貝勒十員二等六員三等四員固山貝子三等六員公三等四
員○乙未諭投誠朝鮮都總兵官林慶業率所部兵歸國勿帶島
內漢人石城島總兵馬登洪報所部各島將士人等籍貫聽候安
置其朝鮮貢米船往來勿禁○以朱瑪喇爲兵部侍郎由兵部理
事官遷
孫之獬爲禮部左侍郎由侍
講遷○添設紫禁城門滿洲章京每旗各
一員○戊戌山西巡撫馬國柱奏我軍遇賊於汾州斬二千餘級
獲馬千餘追至青龍永甯黃河一帶賊倉卒投河溺死者無算又
獲馬五百餘進至平陽賊棄城遁山西全省平○香鑪寨賊首錢
子亮錢樓等喬家寨賊首趙建英等偕號大王僞稱都守徧行劫
掠保定巡撫王文奎遣署總兵官王璟等討滅之○己亥以張毓
泰爲山西布政使司參議管按察使事故明通州
道參議○庚子僞總兵

定西伯唐通令副將陳大典上故明原賜銀印玉帶金爵玉杯金簪蟒衣紅片金雨衣等物收所繳銀印餘物給還加封定西侯○壬寅定諸王貢獻例慶賀萬壽元旦冬至貢鞍馬金珠貂皮綵段諸物許各隨所有以獻攝政王十八件輔政王九件和碩親王六件多羅郡王三件平西王三件恭順王懷順王智順王各二件多羅貝勒以下免其貢獻○高密賊首張輿僭稱總鎮大元帥與其黨武印徐振管相周等及青州賊寇結連倡亂膠州署總兵官柯永盛擒斬之○癸卯給事中龔鼎華等奏開國之初宜從寬大古稱禮不下庶人而刑不上大夫明乎優臣工所以尊朝廷也若名在卿貳之列而束縛繫絀下同徒隸罪止銖兩之微而性命鴻毛棄如草芥人孰肯以性命易功名夫嚴刑不足以防奸而寬大固可以得眾乞皇上以收攬豪傑之圖爲勅垂基業之本開誠

曉諭以安天下士大夫疑懼之心是臣等之所以效忠悃於朝廷而尊萬世之鴻圖者也得旨貪官必誅屢旨甚明何必論賊多少以後各官著用心砥礪朝廷自有優禮○先是設看守故明十三陵每陵夫二十四名田二十二頃至是定制除萬厯陵不設外其十二陵各設太監二名夫八名照役給田仍命戶部量給歲時祭品○己酉修政厯法湯若望奏臣等按新法推算月食時刻分秒復定每年進呈厯目惟民厯七政經緯躔度與中厯相距厯上吉壬遁六種依次虔造進呈內與舊法重複者刪去以免溷淆得旨禮部知道欽天監印信著湯若望掌管所屬該監官員嗣後一切進厯占候選擇等項悉聽掌印官舉行○庚戌封勒克德渾爲多羅貝勒○以中原平定遣朝鮮國王質世子李滄歸國賜滄及陪臣鞍馬貂衣段疋仍頒諭朝鮮國王李倬曰朕戡定中原誕登大

位人民愛戴率土蒙休故特渙綸音大赦天下爾朝鮮國據誠效
順歷有歲年恪共藩服宜沛隆恩特遣爾世子李滢歸國所有一
切罪犯盡行赦除其永不敘用官李敬遇李明翰李敬式閔性慧
四人爾世子欲求任用姑如請准從此外諸員仍不准敘用自十
月初一日以後諸罪概不准援赦至每年進貢方物皆出於民其
額進紵布四百疋蘇木二百斤茶一千包俱著蠲免再各色棉紬
二千疋著減一千疋各色細布一萬疋著減五千疋布一千四百
疋著減四百疋粗布七千疋著減二千疋順刀二十把著減十把
餘俱如舊其元旦冬至萬壽慶賀禮物念道途遙遠俱著於慶賀
元旦時一併附進○御史甯承勳奏賦役之定制未頒官民無所
遵守祈敕部於賦役全書外無藝之徵盡行裁革如恩詔內有全
免者有免三分之一者著定書冊刊布海內令州縣有司遵照規

條戶給易知由單庶愚民盡曉永遵良規下戶部議○癸丑以陸

之祺爲山西左布政使故明陝西布政使張士第管山西右布政使事參

政○巡視北城御史劉今尹奏京城九門鹽法原係北城管理今

或令戶部統攝或仍歸臣衙門得旨鹽法總歸戶部管理○山東

沂州總兵夏成德奏解宿遷縣圍殺賊兵六千餘人獲馬贏旗纛

等物又遣游擊劉范德守備孫萬壽文成功往取贛榆擒斬僞都

司王有年守備王建仁拔其城報聞

十二月丙辰河南巡撫羅繡錦奏河南土寇叛亂已久狡猾性成

前招降李際遇將近兩月未見來歸以此類推降誠難信況中州

南有明兵西臨流寇有報賊抵河南府立營者有報許定國高傑

等兵馬俱臨河岸者有報張縉彥已受明山西直隸河南總督職

者又有報凌駟結連土寇以書招董學禮過河者種種情形以臣

度之彼皆伺我兵所向以乘其隙耳如我軍南下則就中行其叵測如我軍西入則乘虛以犯河北二者必居一於此乞亟賜熟籌大軍南渡或將南岸沿河一帶土孽先行撲滅去其肘腋之患則河北可保無虞下所司速議羅繡錦又奏懷慶鎮臣金玉和抗敵死難得遺骸於柏鄉迤西地方請加優卹以慰忠魂得旨金玉和盡忠報國應得卹典著兵部查例具奏○丁巳出故明府庫中財物賞八旗滿洲蒙古漢軍將士及外藩蒙古官員○己未順天巡按柳寅東奏清查無主之地安置滿洲莊頭誠開闢宏規第無主之地與有主之地犬牙相錯勢必與漢民雜處不惟今日履畝之難日後爭端易生臣以爲莫若先將州縣大小定用地多寡使滿洲自占一方而後以察出無主地與有主地互相兌換務使滿漢界限分明疆理各別而後可蓋滿人共聚一處阡陌在於斯廬舍

在於斯耕作收放各相友助其便一滿人漢人我疆我理無相侵奪爭端不生其便二里役田賦各自承辦滿漢各官無相干涉亦無可委卸其便三處分當經界明漢民不至竄避驚疑得以保業安生耕耘如故賦役不缺其便四可仍者仍可換者換漢人樂從其中有主者歸併自不容無主者隱匿其便五下戶部詳議速覆○庚申保定巡撫王文奎奏各府州縣蹈明季舊習優免太濫致虧正額取盈攤派最爲厲民宜嚴加禁革從之○眞定巡按衛周允奏巡行各處極目荒涼舊額錢糧尙難敷數況地畝荒蕪百姓流亡十居六七若照額責徵是令見在之丁代逃亡者重賦墾熟之田爲荒蕪者包賠也臣以爲欲清荒田法在丈量欲清丁法在編審果能徹底清楚則錢糧自有實數官吏無巧蒙之弊百姓免代賠之累矣下所司議○登萊巡撫陳錦奏土寇秦尙行王家忠

翟謬等乘青州之變復聚眾作亂欲結連劉澤清共扶楊威稱帝
勢甚猖獗三百里之內人民俱遭蹂躪臣遣兵征剿尙行從謬俱
就擒伏法家忠亦爲鄉民所殺臣以書招楊威散其黨七千人威
削髮入山臣恐爲後患復擒斬之傳首各處事下所司○平定山
西固山額真葉臣等奏大軍道經直隸河南山西共平府九州二
十七縣一百四十一各委署官吏安輯居民沿途招降故明翰林
朱之俊員外郎董直愚主事胡全才指揮李升遊擊黑有德及從
賊故明兵部尙書張縉彥知縣李若星副將董學禮康元勛惠應
召參將馬元遊擊劉永等大軍旣抵太原陝西漢中府閬郡紳士
百姓俱獻書投降○遵化縣紳民奏遵化乃近關要路請命巡撫
宋權仍自密雲還鎮遵化以資彈壓從之○壬戌定宮中喪制凡
大喪宮中守制二十七箇月不懸門符不張綵鐙京以內諸王同

惟官民不禁其妃喪本宮及妃之子守制二十七箇月餘妃之
不守制○癸亥故明左都御史曹思誠至京以疾辭歸允之賜貂
裘一襲以示優禮並給與應得誥廕○甲子裁太僕寺衙門以馬
本折錢糧已歸併戶部也○喀爾喀部土謝圖汗等來貢○丁卯
以太宗文皇帝第六女固倫公主下嫁固山額真阿山子夸札
○戊辰定國大將軍豫親王多鐸奏兵至孟津遣護軍統領圖賴
先率精兵渡黃河流賊僞都司黃士欣果毅將軍張有聲遁沿河
十五寨堡兵民望風歸順睢州僞總兵許定國五寨首領李際遇
等各擁眾四五萬亦遣人來降隨撥兵防守各處大軍向潼關進
發○己巳諭刑部都察院曰自流賊作亂以來民間每將殺擄叛
亂不赦等罪紛紛互告以致民心不定今特再行赦宥凡僞官投
誠歸順及明朝降賊官員並土寇爲亂今能改過自新者一併蠲

除前罪咸與赦免如有才堪驅策不妨因人器使直隸山東山西河南陝西等處已順官兵自順治元年五月初二日以前罪犯無論大小悉赦除之有仍以赦前事相告者卽以其罪罪之初二日以後不在赦例其官民逋貸雖在初二以前仍准取償陝西湖廣四川河南浙江江西福建廣東廣西雲南貴州等處未經歸順人民所犯罪惡一併赦免僅投順以後或犯罪惡依律究治○豫親王多鐸等奏大軍至陝州敗賊將張有曾於靈寶○庚午上太祖武皇帝 孝慈武皇后冊寶於 福陵 太宗文皇帝冊寶於昭陵○丙子裁遵化密雲山海推官撫甯同知○丁丑諭戶部我朝建都燕京期於久遠凡近京各州縣民人無主荒田及明國皇親駙馬公侯伯太監等死於寇亂者無主田地甚多爾部可概行清查若本主尙存或本主已死而子弟存者量口給與其餘田

地盡行分給東來諸王勳臣兵丁人等此非利其地土良以東來諸王勳臣兵丁人等無處安置故不得不如此區畫然此等地土若滿漢錯處必爭奪不止可令各州縣鄉村滿漢分居各理疆界以杜異日爭端今年從東先來諸王各官兵丁見在京各部院衙門官員俱著先撥給田園其後到者再酌量照前與之至各府州縣無主荒田及征收缺額者著該地方官查明造冊送部其地留給東來之兵丁其錢糧應征與否亦著酌議至熟地錢糧仍照額速征凡紳民有抗糧不納者著該撫按察處有司官徇情者著撫按糾參若撫按徇情事發爾部卽行察奏○己卯遣內大臣何洛會等祭 福陵尙書聶阿岱等祭 昭陵告武成○命固山額眞阿山偕左翼管梅勒章京事阿哈尼堪右翼固山額眞馬喇希由蒲州濟河協征流寇○辛巳有劉姓者自稱明崇禎太子內監楊

玉爲易服送至故明周后父周奎家時崇禎帝公主亦在奎所相見掩面泣奎跪獻酒食旣而疑其僞具奏以聞隨令內院傳故明貴妃袁氏及東宮官屬內監等辨視皆不識問以宮中舊事亦不能對袁氏等皆以爲僞惟花園內監常進節指揮李時蔭等執以爲眞吏部侍郎沈惟炳御史趙開心給事中朱徽等各言事關重大宜加詳愼因下法司覆勘得假冒狀楊玉李時蔭等十五人皆棄市以開心奏中有太子若存明朝之幸一語亦論死因係言官免罪奪俸三箇月仍令內院傳諭內外有以眞太子來告者太子必加恩養其來告之人亦給優賞○是歲鹽七十一萬九千五百五十引鹽課銀一十五萬八千九百七十三兩有奇鑄錢七千一百六十六萬三千九百有奇